

UN ANTIANO DEN DUDA

"Mi ta sinti un burako bashi den mi bida
ku aki na Ulanda mi no por yena.
Mi ta korda nos beachnan ku koló di puresa
luminá pa nos solo kandeloso.
Mi ta korda nos mondinan dorná ku aloë i kadushi
unda nos ta tira stichi riba yuwana i tofolika
i koi drado i piki shimaruku.
Mi ta korda nos wega di dominó
tur djabomíngo bao palo di un watapana.
Mi ta korda e dansa di tambu
ku su un pami un pabo.
Mi ta korda nos sopi mondongo
ku funchi halá o pan batí.
Mi ta korda dia aña bieu wordu tirá dor di donderbos
i aña nobo wordu kantá dor di nos dandenán.
Mi ta korda karnaval ku su bulamento p'aki p'aya
i ku ta alegrá pa nos steelbandnan.
Mi ta korda.....Te despues?
Nó, aki na Ulanda mi wowo ta wordu yená.
Mi ta korda e salaris basta hoog, e voorzieningen sociaal
bibliotheken masha groot i otro middelen
ku ta nuttig pa mi ontwikkeling."
Pero for di e murmurashon di e obrero oprímí
for di e yoramento di e chikí deskuidá
for di e gruñamento di e 'stoma' di nos pueblo
tanto aña kolonisá i mal manejá
ta resoná:
"Antiano, sintá riba bo sintí,
e tera, aworaki seko, ku a produsibo
tin mester di wordu freská pa bo sodó."

Rudy Lampe